

# Gabi, Sa Lucban

VANESSA HARO

Kung minsan, gusto kong isiping sabay  
Kaming gumulang ng hangin. Ipinagpapalagay ko,  
O ng hangin bilang ako, na sabay kaming dumaos-os  
Sa kaluskos ng kurtinang may burda;  
Sa labi ng mga nakayuping dahon sa paso;  
Sa iyong mga labi –  
sa iyong mga labi.

Ganito ko tiniis ang pangangatal noong isang gabi:  
Isang gabi, walang buwan. Tila buhok ng aking ama ang mga ulap.  
Binabalakubak ang langit sa mga tala nang tinantsa ko ang distansya  
Ng ating mga katawang lumulutang sa ibabaw ng nasaid na lambanog. Ako,  
Bilang hangin, sabay kaming dumaos-os.

Nagbukas-sara ang kanyang mga mata  
Kahit alam kong hindi naman talaga siya mulat nang pumatak sa sahig

Ng aking mga pangamba.  
Alam ko, alam ko  
Kuyom ang mata ng mga salitang nais sabihin: Ilang beses na bang  
nagkulang ang tiyak?

Sunod-sunod umagos ang mga butas ng aking katawan.  
Nagsimula sa pusod, sa ari, tumigil sa ari. Naalalang palagi kong pag-aari  
Ang mga init sa buong silid. Ang kumot. Ang punda. Ang babae.  
Ang babae.  
Palagi kong tinatanaw ang Bundok Banahaw sa kanluran ng gumugulang  
Na rin naming bintana. Gabi-gabi itong tinitirhan ng hamog,  
ngunit papasuin ring pihado  
Ng palad ng aking asawa sa umaga.  
Habang lumuluha, minamasdan kami ng hangin sa daan,  
Lumalayo, lumiliit, na gumugulang,  
Umiibig,  
Nang hindi sabay.